



~~48~~ 61

DECLARATION

DES BONS

FRANÇOIS.

A LA REYNE.

Sur la lettre de Monsieur  
le Prince.

M. DC. XV.

10  
11  
DECLARATION

FOR BOND

Case

F

39

THE NEW YORK  
LIBRARY

.326

1615 de

VI DE M



DECLARATION  
DES BONS  
FRANÇOIS.

A LA REYNE.

Sur la lettre de Monsieur  
le Prince,

MADAME,

Si quelqu'un d'entre nous auoit douté iusqu'à cette heure de la bien-vueillance du peuple enuers vostre Maieſté, les vœux & les prieres que la tristesse publique mit ces iours passez en la bouche de tous les gens de bien sur le bruiet de vostre dernière indisposition, luy en ont peu tellement faire cognoistre la verité qu'il n'en peut attendre ny desirer desormais vn plus certain & pl<sup>s</sup> suffisant tesmoignage. Car n'y ayant personne qui ne sçache qu'en vostre salut tourne celuy de tout ce grand Estat, durant le bas aage du Roy, l'amour qu'un chacun porte a sa patrie a esté la mesure du soing qu'il a eu de vostre santé. Laquelle puis qu'il a pleu à Dieu de rendre aussi promptement qu'heureusement à nos souhaits, nous auons si iamaïs nous l'eusmes, vn tres-grand subiect

premierement de le remercier de la faueur singuliere qu'il vient de faire à la France en vostre personne, & puis de le prier, comme nous faisons de toute nostre affection, que vous conseruant l'ôguemêt par sa grace à ceux que vous auez conseruez sagement par vostre cōduicte, il fortifie tousiours de son assistance particuliere, la iustice de vos saintes & loüables intetiôs contre la violence de ceux qui sous vn faux pretexte du bien public iettent dans les ruynes de leur paysle fondement de leur aduantage & profit particulier. Le nôbre desquels estant meshuy beaucoup plus grand qu'il ne feroit à souhaiter pour les bons François semble desia menacer la concorde & tranquillité publique de quelque emotion intestine. Car n'y ayant rien qui se prouigne plus aisément dans les esprits du peuple que la calomnie couuerte d'un nom specieux & plausible, l'artifice avec lequel ils ont depuis quelque temps descrié le gouvernement de l'Estat à tellement altéré l'obeyssance publique, que la rebellion qui estoit autresfois vn crime est deuenüe maintenant parmy nous vne marque de zele, & de courage. C'est le malheur deplorabile de ce temps. Auquel affin que la posterité ne nous puisse quelque iour accuser d'auoir en quelque façon participé, nous auons estimé, M A D A M E, estre de nostre debuoir de faire entendre à vostre Majesté, & par elle au Roy sous l'autorité duquel vous continuez à sa priere le manimêt des affaires publiques, que tant s'en faut que nous adherions en aucune maniere à leurs

mauuais & pernicieux desseins, qu'au contraire nous les detestons, nous les abhorrons au-  
rant que nous aymons, que nous cherissons la  
paix & seureté de l'Estat.

Des confusions & desordres duquel quand  
nous les oyons se plaindre, nous ne pouuons  
voirement que nous n'en soupirions avec eux  
& que nous n'en souhaitions vne reformation  
conuenable; mais quand nous voyons qu'ils  
tournent la liberté des plainctes en vne licen-  
ce de calomnies, qu'ils enuient les playes  
publiques de la virulence de leurs discours cor-  
rosifs, & qu'ils blessent couuertement l'autho-  
rité souveraine du maistre en la personne de ses  
ministres, nous leur declaron, nous leur de-  
nonçons, nous leur protestons que les te-  
nants pour perturbateurs du repos public nous  
ne voulons point debuoir à leur furieuse &  
criminelle insolence le bien que véritablement  
nous desirons pour le moins autant qu'eux,  
mais tout autrement qu'eux. Car nous sçauôs,  
M A D A M E, qu'après nos remonstrances &  
supplications tres-humbles, lesquelles on ne  
nous a iamais refusé d'écouter, il ne nous re-  
ste plus maintenant que la patience d'attendre  
ce qu'il plaira à vos Maiestez de respondre aux  
cayers des trois ordres assemblez pour reme-  
dier à nos maux, sans abuser de la liberté qu'on  
nous a donnée contre ceux qui la nous ont  
donnée, ainsi que font ceux qui adioustants les  
menaces aux plainctes appellent par vne voye  
extraordinaire de tout ce qui ne se fait comme  
ils veulent à la poincte de leurs espees, & crient



pour tous griefs que les Deputez aux Estats ont esté corrompus. Mais nous leur demandions volontiers, s'il leur plaisoit de nous répondre, par qui. Par le Roy? De qu'il innocence encore toute blanche est entierement incapable de tout dol & de tout artifice. Par vous, M A D A M E: à qui ceux là mesmes qui se donnent la licence de calomnier tout ce qui ne leur agree pas n'imputent autre chose qu'une trop grande douceur & bonté. Par les Ministres de l'Estat? Qui appelez nourris & dressés aux affaires par le feu Roy d'heureuse memoire ont tellement maintenu par leur prudence la paix qu'il nous auoit acquise par sa valeur, qu'on ne peut blasmer leurs deportements sans condamner celuy duquel ils n'ont fait que suivre & retracer les exemples. C'est pourquoy nous auons esté grandement estonnez que la malice artificieuse de certaines gens ayt eu tant de pouuoir sur Monsieur le Prince que de luy donner ceste faulse impression, ainsi que nous auons veu par sa derniere lettre: qui ayant esté diuersement receuë selon la diuersité des passions qu'elle a rencontrees dans le peuple nous à semblé meriter ceste particuliere Declaration de nostre part, affin que vostre Maiesté sçache que la France n'est pas encore du tout si malheureuse, qu'elle n'ayt en cette vniuerselle depuration des mœurs, des reiettons de ces bons François, qui au milieu des tempestés dont elle a autresfois esté batue ont conserué fidelement à leurs Princes leur obeyssance inuiolable. Ainsi que nous sommes tous resolu

de faire, au peril de nos biens & de nos vies: lesquelles nous estimons ne pouuoir plus heureusement employer que pour la manutention & defense de l'autorité Souueraine contre qui que ce soit. Et qu'on ne nous oppose point icy l'autorité du premier Prince du Sang, qui estant grande & venerable à la verité comme elle est, ne doibt pas neantmoins auoir plus de poids & de force sur nous que la prudence & la raison. Car de dire qu'il ne feroit pas les demandes qu'il faict si elles n'estoient iustes & necessaires, c'est vuidér trop legerement vne cause qui importe à tant de millions d'hommes par le preiugé d'un seul hōme. Lequel nous recognoissons tous veritablement estre entre plusieurs autres excellentes parties doué de tāt de moderation & de douceur qu'il ne voudroit pour rien du monde auoir rien entrepris à son escient contre l'equité, mais nous estimons qu'il se peut tromper, principalement en vn aage qui encore ployable se laisse bien souuent emporter aux mauuais conseils qu'on luy donne. Ainsi fut autresfois le ieune Duc de Berry souleué contre Louys vnzieme son frere, par les Autheurs de la guerre du bien public. Nous sçauons qu'il a des personnes autour de luy qui luy inspirants des mouuemens tout à faict contraires à son humeur ne tachent qu'à faire de son autorité vn instrument de leurs malheureux desleins. Ils ont reconnu en ce naturel benign & paisible, vne inclination au bien & à l'ordre, c'est par la qu'ils le surprirēt il y a quelque temps, luy representans à trauers leurs



passions les desordres publics, beaucoup plus  
grands qu'ils ne sont & luy donnants à enten-  
dre que s'il n'en arrestoit promptement le  
cours par la ruine de ceux qu'ils luy en figuroiēt  
les auteurs, tout estoit perdu sans ressource.  
Qui n'eust du commencement presté l'oreille a  
de si belles & de si plausibles sermons ? Mais  
cōme ils ne craignoient riētāt que ce qu'ils fai-  
soient contenance de souhaiter le plus, aussi  
tost qu'ils le virent disposé à mettre la main à  
l'œuvre, ils esloignerent par faux & meschants  
rapports son affection de ceux sans l'autorité  
& l'entremise desquels il luy estoit impossible  
d'en venir à bout, iusques à luy persuader qu'o  
proiectoit de l'arrester s'il ne se retiroit. De  
sorte que nous feusmes estonnez de le voir de-  
māder de Mezieres par lettre ce qu'il luy estoit  
sans doute beaucoup plus facile & plus hono-  
rable de proposer à Paris de sa bouche. Ce fut  
la premiere faute qu'ils luy firent faire : Faute  
que nous pouuons dire estre la seule cause de la  
peine en laquelle nous sōmes maintenāt. Car  
ces soudains esloignemēs, ces retraits en pla-  
ces fortes, ces menées couuertes dās les prouin-  
ces conduictes sous l'autorité de son nom,  
ayants remply la France de deffiances & d'om-  
brages nous ont pour le present priuē du fruiēt  
que cette tenue d'Estats nous eust autrement  
apporté. Pource que la craincte d'affoiblir  
mal à propos par vne mutation trop soudaine  
vn corps menacé de factions intestines a con-  
trainct ceux qui gouuernent de remettre à vne  
meilleure saison les remedes des maladies dont  
il est trauaillé.

Il n'y auoit desia que trop de malcontents, sans en accroistre le nombre par vn changement d'ordre qui offensant plus de gens qu'il n'en eust contenté, n'eust seruy qu'à fortifier les entreprises de ceux qu'on sçauoit auoir encore le courage armé pour remuer aussi tost qu'ils en auroiēt le moyen. Nous sçauons asseurement que l'intention de sa Maiesté estoit de supprimer la venalité des Offices avec le droict annuel, de moderer l'excès des pensions, & de soulager par ce moyen le pauvre peuple. Elle nous à donné de tres-certaines arres de ce desir. Mais c'eust esté vne grande inconsideration à ceux qui ont l'honneur de le conseiller d'ouuir les mecontentemens des plus puissants du Royaume aux praticques qu'ils sçauoient se continuer couuertement contre le repos public. Voila le vray, voila le seul motif du retardement des bons effects que nous nous estions promis de la tenuë de ces Estats. Ce que si beaucoup de gens auoient compris ils iugeroient tous autrement des affaires & des personnes qu'ils ne font. Mais le simple peuple ne penetrant iamais le fonds des choses, & s'arrestant aux seules apparences, comme à ces images qu'Epicure disoit rejallir de la surface des corps, est incapable de cette prudence politique, qui estant comme vn rayon de cette prouidence eternelle avec laquelle Dieu gouuerne le Monde tōbe raremēt dās les esprits vulgaires & cōmuns. C'est pourquoy il se plainct, ainsi qu'un malade duquel le Medecin differe de percer l'apostume iusqu'à ce qu'elle soit meure. Ce que ceux qui ont voulu gaigner sa creance par vn faux lustre de reformation auoiēt

bien preu, ſçachans que comme la conionction  
 des trois planetes ſuperieures attirant grande qua-  
 ntité de vapeurs altere ordinairement la conſtitu-  
 tion des choſes elementaires, ainſi cette aſſemblée  
 des trois ordres reueillant beaucoup de meconten-  
 tements & de plaintes pourroit exciter la hayne  
 populaire contre ceux auxquels la mauuaile diſpo-  
 ſition des affaires accreuë par diuers artifices, ne  
 permettroit pas d'accorder aux Deputez tout  
 ce qu'ils demanderoient. Ceſt de quoy ils ſe reſi-  
 ionniſſent maintenāt, ſe figurans que le peuple fru-  
 ſtré, pour ceſte heure en partie de ſa longue & iuſte  
 attēte favorisera leurs deſſeins aubefoing. En quoy  
 nous ſommes aſſeurez qu'ils ſe trompent grande-  
 ment. Car comme les ſeruiteurs qui ſe plaignent  
 de leur maĩſtre ne laiſſent pas neātmoins de le de-  
 fendre avec affection & courage quand l'occafion  
 ſ'en preſente, contre ceux qui le viennent attaquer,  
 ainſi les ſubiects encore que poſſible non entiere-  
 ment contents du gouuernement public ſe reu-  
 niſſent aiſement par vn commun deuoir à la ma-  
 nutenction de leur Prince contre quiconque  
 choque ou bleſſe ſon autorité ſouueraine. Ceux  
 qui ont eſté les premiers à crier contre les deſor-  
 dres ſeront les premiers qui courront ſus à ceux  
 qui commenceront à remuer ſur ce pretexte, e-  
 ſtants inſtruits par la cognoiſſance des choſes paſ-  
 ſees que les armes ne furent iamais de bons inſtru-  
 ments de reformation, & qu'il n'y a ſi mauuaife  
 paix qui ne vaille mieux qu'une bonne guerre, la-  
 quelle eſtant la ſource de toutes ſortes de meſchā-  
 cerez & de miſeres ne peut ſembler vtile qu'a ceux



qui ont l'ame mauuaise, cōme la Planete de Mars qui preside, aux combats, ne paroît brillante qu'à ceux qui ont la veüe foible & delicate. Et pourrât, MADAME, ne faut il pas que vostre Maiesté entre en aucune deffiance de nostre fidelité, de laquelle nous luy rendrons en toutes occasions toutes les preuues qu'elle peut desirer. Nous honorons grâdemment Monsieur le Prince, comme nous deuōs; Mais puisque la regence du Royaume durant la minorité du Roy, & la direction des affaires depuis sa maiorité a este solennellement defferee à vostre sagesse & prudence, nous sçauons, & qui ne le sçait l'apprene, que nous ne pouuons auoir autre regle, autre nîueau du bien public, que vostre authorité, que vostre volonté: C'est pourquoy les mariages du Roy & de Madame sa sœur, faisant partie de cette heureuse & paisible administratiō & ayāts d'abōdant esté cōfirmez par l'approbatiō cōmune des trois Ordres, nous reiettons comme seditieuses & turbulentes, toutes les propositions qu'on seme parmy nous pour en rompre ou retarder l'accomplissement, Qu'ils crient à gorge ouuerie tant qu'ils voudront que cette alliance sera la ruyne & la dissipation de l'Estat. Nous sçauons qu'un tel traicté n'ayāt autre but que le bien & repos commun de la Chrestienté ne peut estre avec raison suspect qu'à ceux qui nourissent leurs ambitions particulieres des calamitez publiques. Car pour ceux de la Religion dont quelques vns nous menacent, leurs derniers Deputez arriuez depuis peu de Grenoble nous ont faict cognoistre que pourueu qu'on leur maintienne la liberté des

Edits, cōme on est resolute faire, ils ne ferōt iamais de leurs villes d'ostage des villes de retraite à ceux qui voudroiet troubler le Royaume. Et sagement. Car s'ils auoiet vnefois attiré sur eux la hayne du peuple par la moindre rebelliō du mōde commēt qu'elle fust coloree, ils auroiet grādemēt à craindre qu'on ne les traitast à l'aduenir autrement qu'on n'a fait par le passé. Quāt aux Princēs estrāgers, ceux qui scauent l'interest commun qu'ils ont tous à n'autoriser par leur exemple la rebelliō de leurs subiects contre eux en pareilles affaires, n'apprehenderōt iamais qu'ils violent l'alliance qu'ils ont auec le Roy par aucune menee contre son seruice. Il ne faut donc point doubter que sa Maiesté ne soit accompagnee en son voyage de Guyēne quād bon luy semblera de le commencer, non seulement des vœus & des benedictions, mais aussi des forces & des armes de toute la France, qui esclairee des gratieux rayons de son visage, conuertira ses fausses apprehensions en vrayes resiouissances, & ses alarmes funestes en superbes & magnifiques triumphes. Son passage sera la voye de lait, en laquelle ne s'engendrent ny tourbillons ny tonnerres. Qui oseroit s'y opposer? Et quand on le feroit, toutes les traueses qu'on luy donneroit semblables à ces nuees qui opposees au Soleil le couronnent, ne seroient que les premieres matieres de sa gloire. Qu'il aille donc à la bonne heure, quand il luy plaira; mais le plustost sera le meilleur. Ce sera son contentement, ce sera nostre bien. Car nous esperons & nous l'esperons avec autant d'apparēce que de raison, qu'ayāt dissipé par cette



nouvelle alliance tous ces nuages de diuision il aura moyen de remedier sans crainte suiuant la promesse qu'il nous en a desia faicte, aux abus & desordres dont on se plainct maintenant ; A l'exemple de son grand ayeul S. Louys, lequel apres auoir rangé par la vigueur & dextérité de Blanche sa mere les Princes qui sous vn pretexte tout semblable à celuy qu'on faict auourd'hui prendre aux nostres trauersoient sa minorité, conuertit son esprit au retablissement de son Royaume, commençant par vne reformation de soy mesme vrayement digne de cette rare saincteté qui la mis à la fin dans le ciel. Le terme n'est pas long; Vn peu de patience pourra remettre peu à peu toutes choses en l'estat que nous desirons, au contentement de ceux qui en poursuiuent le reglement avec plus de contention & de vehemence que l'estat present de nos affaires ne requiert. Car ils voudroient qu'on contentast en cela leurs desirs; auant qu'on fit le voyage, dont la parole donnée au Roy d'Espagne, ainsi que sa Maiesté leur à faict entendre par ceux qu'il leur à enuoyez à Creil, à Clermont & à Coucy, ne peut souffrir qu'on differe l'acheminement.

Ils demandent outre cela qu'on punisse en mesme temps ceux qu'ils disent estre les auteurs des confusions auxquelles ils estiment deuoir estre promptement pourueu, qui est proprement demander que le Roy faisant de ses plus confidens seruiteurs vne victime à leurs passions, condamne vostre Maiesté, M A D A M E, en la personne de ceux du conseil desquels elle s'est tres-vilement seruiue pour maintenir l'autorité souueraine avec la siéne.


Nous ne doubtons point qu'ils ne se prissent à vous  
 fils osoient, & qu'ils ne vous demandassent la re-  
 stitution de tout l'argét qui ayât esté donné à autres  
 qu'à eux leur semble auoir esté mal employé. Car  
 c'est ce qu'ils appellent profusion. Mais qu'ils luy  
 donnent le nom qu'ils voudront, pourueu qu'on  
 reconnoisse que la distribution qui en a esté faicte  
 dans les prouinces avec choix & iugement, selon  
 les occurrences, a esté le ciment de cette heureuse  
 & profonde paix de laquelle nous auons iouys sous  
 vostre Regence. Nous scauons ou en a passé la plus  
 grande partie & pour le reste ne faisons point de dou-  
 te, M A D A M E, que si vostre Maieité n'aymoit  
 mieux rédre compte de ses actions que de ses despê-  
 ses, ainsi que respōdit autrefois genereusement ce  
 braue & valeureux Romain, elle ne fist voir qu'elle  
 l'a mis où il falloit. Ce que nous disons particu-  
 lieremēt, pource que nous voyons que c'est la plainte  
 qu'ils font le plus haut sonner entre tous les autres  
 desordres; qui a vray dire sont tous plustost vices  
 des tēps que des personnes, & qui n'ayāt pas esté  
 introduits par malice, ains seulement tolerez par  
 prudēce ne meritēt les vacarmes qu'on fait cōtre  
 ceux ausquels on les impute fausemēt. Mais pour  
 reuenir à ceux dont nous parlions, il seroit fore  
 malaisé de nous persuader que leur cause se peut  
 separer de la vostre. Ce que si Monsieur le Prince  
 auoit pris le loisir de bien considerer comme peut  
 estre & Dieu le veuille, pourra il faire, il reiette-  
 roit sagement les conseils de ceux qui font de sa  
 qualité vne planche à leur ambition, & venant re-  
 nir aupres du Roy le rang qui luy est deu, ainsi que

sa Maieſté l'a cōuié de faire par le miniſtere de pluſieurs perſonnes de marque, eſloigneroit de ſa reputation par ſon retour le blaſme dōt la poſterité qui iuge plus hardiment des grāds, chargera poſſible quelque iour ſa memoire d'auoir en vne actiō ſi celebre & ſi importante qu'eſt l'accompliſſement de ces mariages, refusé ſon conſentemēt aux vœus communs de la Chreſtienté Catholique. Quoy qu'il en ſoit, quoi qu'il en aduiēne, quoi qu'on die, quoy qu'on faſſe au cōtraire, nous ſouuenans de ce que nous deuons au Roy & apres le Roy, à voſtre Maieſté M A D A M E, nous ferons voir, s'il en eſt beſoing à tous nos voiſins que nous ne ſommes pas moins heritiers de la fidelité de nos peres que de leur inuincible courage & valeur.

F I N.



Handwritten text, likely bleed-through from the reverse side of the page. The text is arranged in approximately 15 lines, though it is extremely faint and largely illegible due to fading and the quality of the reproduction. Some words are difficult to discern, but the overall structure appears to be a continuous paragraph or a list of entries.




54.

S E R M E N T  
D E  
F I D E L L I T É.

M. DC. XV.





Vous jurez à Dieu,  
de bien & fidèlement  
seruir le Roy, sous  
l'autorité de Monsei-  
gneur le Prince, & non  
d'autre. Promettés qu'  
il ne se passera rien cō-  
tre son seruice sās l'ad-  
uertir. De le seruir en-  
uers & contre tous: &  
speciallement cōtre les

cinq Tyrans qui abusent du nom du Roy: se veulent attribuer auctorité Souueraine, & sur tout, contre ceux qui setrouueront accusez & coupables de la mort du deffunt Roy son pere, afin que la justice en soit faite ainsi qu'il appartient.

